

REGIONAL NEWS

HEADLINES (EVENING)

1. ZPM sorkarin kuthnathawktute thar chhuah man man zawka hralh tura thu an tiam avangin kumin hian sawhthing quintal nuai 11 thelh thar beisei a ni.
2. Nizan khan ruah a sur tam avangin Mizoram chhung hmun hrang hrangah chhiatna a thlen belh.
3. National Investigation Agency (NIA) chuan Ningani khan Myanmar lama ralhuam tawlh ru thin ni a puh mi 10 lakah charge sheet an thehlut.
4. Tripura-ah dan lova lut, Bangladesh mi 7 leh Rohingya 2 man an ni.

<><><>

GINGER

ZPM sorkarin kuthnathawktute thar chhuah man man zawka hralh tura inthlan hma leh an sorkar hnu a thu an tiam avangin kumin hian sawhthing quintal nuai 11 thelh thar beisei a ni.

Horticulture department hotute hnen atanga thu dawn danin kumin hian chhungkaw 25,102 chuan ram acre 27,608 point 528 a zau-ah sawhthing quintal nuai 1, sing 6, sang 8, 583 leh kg 298 an ching a. An thar chhuah theih zat tur hi quintal nuai 10, sing 9, sang 3 leh 299 vel ni a chhut a ni. Hetih lai hian sawhthing a tam nasat avangin sawhthing chingtu tam takin harsatna an tawk mek a. Hetianga kumina sawhthing ching chhungkua leh sawhthing chin a lo pun tak chhan hi sorkarin a hralhna a hmuhsak dawna an rin avang leh sawhthing man a tlak hniam pawh a, sum an hloh lohna tur atana sorkarin sum thawhsak a tiam vang niin a lang. Hetih lai hian kumin hian sawhthing a tam nasa hle a, hemi avang hian kuthnathawktute hian an thawh rah ang an seng lovang tih an hlau hle. August ni 16-a horticulture department hnen report lut atanga a lan danin sawhthing chingtu chhungkaw 25,102 zinga chhungkaw 6,568 te sawhthing chinna ram, khaw 236 chu sawhthing tam hian a khawih mek a ni.

Sorkarin sawhthing tam do tura August ni 16 atanga beihpui a thlak tan 'Operation Ginger 2024 - Fehchhuah Runpui' -ah chuan Nilaini thleng khan khaw 367 a sawhthing chingtu mi 5,376 te hnenah zirtirna pek a ni tawh a ni.

Sorkarin 'Bana kaih' ruahmanna hmanga thlai chingtute puih a tuma kal mekah sawhthing bakah thlai dang pawh kumin hian chingtu an pung niin horticulture department hotute chuan an sawi a. Aieng hi chhungkaw 3,415 chuan ram acre 4,282 point 6-ah quintal 7,817 leh kg 155 an ching a, thar chhuah an beisei zat chu quintal 81,609 leh kg 9 a ni. Chutiang bawkin hmarcha te hi chhungkaw 8,687 zetin ram acre 11,831 point 42-ah quintal 585 chu kumin hian an ching a, quintal 37,929 leh kg 457 thar an inbeisei a ni.

<><><>

GRAPE WINE

Champhai District-a Tlangsam leh Hnahlan khua a Grape tuisawrna, (Winery)-ah tunlai hian Grape rah lei mekin, an lei khawl ang ang te an sawr nghal zel.

Member 133 awmna, Champhai Grape Growers Society chuan kumin July ni 9 atang khan grape rah an lei tan a, tun thleng hian quintal 1,202 vel lei tawhin kum dangah chuan an member ta chauh lo pawh an lei laiin kuminah chuan an member ni lo, grape rah lei sak tur an awm meuh lo. Kum kalta khan grape rah quintal 1,069 leh kg 6 lei khawlin Kg khat Cheng 60 hisap in an la a; grape rah an lak te hi an lak ni la la-in an sawr nghal tlangpui a ni.

Champhai Grape Growers Society hruaitute hnen atanga thu dawn danin, kum kalta a grape an lak, a tui sawr sate chu pakhat mah dehral a la ni lova, grape tui sawr sa litre nuai khat vel an la kawl mek a. Hetihlai hian Baptist Church of Mizoram in Sakrament atana an lei sak erawh Inremna thuthlung awmsa angin hralhchhuah a ni a, anni hian kum khatah Case 200 vel an lak sak thin a ni.

Champhai Tlangsam a Winery atang hian Champwine pangngai hi ml. 750 leh 375 ml. ang siam a ni a, Champwine Premium hi ml. 750 siam a ni. Sacramental Wine hi ml. 750 siam a ni thung a. Vendor te kal tlangin heng wine te hi hralh a ni a, hetihlai hian Sawrkar atanga phalna (Licence) nei ve si lo, mimal wine chi hrang hrang siamchhuak ve an awm nual avangin Champhai Winery atanga siam chhuah wine te hi Vendor ten an hralh chak loh phah niin grape chingtu pawl hruaitute hnen atanga thu dawn a ni.

Hnahlan Winery ah pawh July ni 17 atang khan loneitute tharchhuah grape rah an lei tana, Kg. khat cheng 60 zel hisapa leiin vawiin thleng hian quintal 830 vel leikhawl tawh a ni a. An lei ang angte chu a tahtawla sawr nghal zel a ni bawk. Member 200 vel awmna Hnahlan Grape Grower Society hian winery atanga an siam chhuah Isabella an tih hi vendor-te kaltlang chauhin an hralhchhuak mek a, hetihlai vek hian kum kalta lama grape tui an sawr sa litre sing 4 vel hralhchhuah loh an la nei mek bawk a, vendor te chauh kal tlang lova zalen taka hralhchhuah theih an duh thu an sawi a ni.

<><><>

DISASTER

Nizan khan ruah a sur tam avangin Mizoram chung hmun hrang hrangah chhiatna a thlen belh leh.

Aizawl-ah chuan Ainawn venga Pu Biakenga in a khi nasa hle a. Hemi avang hian Pu Biakenga te chungkua tiamin chungkaw 3 chu hmun him lamah sawn chhuah an ni a. Zohnuai Primary School hnuai-ah lei a min nasa hle a, Zohnuai kawngah hian Sabereka-khuangkaih a nasa hle bawk. Puan tawh angin Hunthar Govt. M/S bul chu nasa taka a chet belh avangin he kawng hi lirthei zawh atan a him tawh lova, chhiatna nasa zawk thleng thei laka mipui leh lirthei khalhtute an him tlan nan Hunthar Govt. M/S bul kawng chu khar rih a ni a. District Disaster Management Authority (DDMA) Aizawl Chairman leh Bawrsap Pu C. Lalhriatpuia chuan Vaivakawn Zohnuai a Pu Sangthanmawia in chu a rang thei ang bera thiat turin niman khan thupek a chhuah a. Hetiang a nih lai hian Pu Sangthanmawia in hi vawiin chawhnu dar 2 vel khan a

chim ta nge nge ni a thu dawn a ni a. Hemi hnu dar 3 pelh hret khan a chhaka concrete building a chim leh a, Pu Sangthanmawia in chim bang, la sak pum loh pawh a delh chhe nghal vek a ni.

Kolasib district-a Rengtetlangang bula leimin avangin Aizawl leh Silchar inkar kawngpui a ping a. PWD chu leimin thianfai tur hian hriattir an ni tawh a. Serchhip district-a Khawbel-ah leimin engemaw zat a awm bakah Leisang-ah leiminin kawng a hnawh bawk.

<><><>

MSCW

Kumin March atanga vawiin thlengin Mizoram State Commission for Women chuan hmeichhiate harsatna kaihnawih thubuai 95 ziak lutin heng zinga a tam zawk, za zela 80 chuang chu chinfel a ni tawh.

Hmeichhiate'n harsatna leh buaina hrang hrang an tawh leh an dikna chanvo an chan theih na'na an thlavang hauhsak tura din Mizoram State Commission for Women chuan chak takin hemi kawngah hian hna a thawk mek zel tih chairperson Pi C Lalchandami'n a sawi a. Thubuai thehluhte hi Commission chuan a tuartute leh a mawhphurtute ko in hearing a buatsaih thin a, Commission hi Civil Court thuneihna nei a nih angin thubuaite hi court pangngai a sum tam zawk sen ai-in a lo chinfel sak mai thin a. March atanga thubuai ngaihtuah zinga a tam zawk, za a 80 chuang chu Commission hian a chingfel tawh a. Buaina tam ber hi Inchungkhur a hleilenna bakah ro chungchang thubuaite, nupa inkar buaina leh inenkawl chhonzawmna tur chungchangte a nih thu a sawi.

<><><>

NIA CHARGE SHEET

National Investigation Agency (NIA) chuan Ningani khan Myanmar lama ralthuam tawlh ru thin ni a puh mi 10 lakah Aizawl a NIA special court-ah charge sheet an thehlut.

NIA thuchhuahin a tarlan danin ralthuam leh puak thei thil dang man chungchanga an charge sheet te hi Lalrintluanga, Laldinpuia, Zoremsanga, Lalbiaktluanga, Lalrinsanga, Zothanmawia, Henry Siangnuna, J Rohlpuia, Laldinsanga leh David Lalramsanga te an ni a. Indian Penal Code, Arms Act leh Explosive Substance Act section hrang hrang tlawh chhana thubuai siamsak an nih angin charge sheet hi court-a thehluh a ni. Hemi chungchangah hian kum 2022 May thla khan thubuai ziah luh a ni a, hei hi Kelsih khaw dai a lirthei pahnih atanga puak thei thil, silai leh a mu thahnem tham tak man a nih avanga ziahluh a ni a, lirthei a chuang mi 4-te chu man an ni. NIA-te'n an chhui chhuah dan chuan Myanmar mi an ram chung leh Mizorama an thawhpuite nen sipai sorkar dotu pawlte tanpuina atan ralthuam an lei khawm thin niin an sawi a. Aizawla awm mek Myanmar mi Lalrinsanga leh mi engemawzat, Myanmar mi leh Mizoram mite chu intiam rualin Myanmar a sorkar dotu pawlte tan ralthuam an thawnlut thin a ni, an ti bawk.

Lalrinsanga hian puak thei thil kawh leh zawrh phalna nei David Lalramsanga leh C Laldinsanga bakah an sangawi zawnpui Lalbiaktluanga leh Zothanmawia te chuan Myanmar rama thawn chhoh turin ralthuam puak thei thil tam tham tak an la khawm niin NIA chuan an sawi a, midang hemi chungchanga an chhui mekte pawh Myanmar

sipai sorkar dotute hnena ralthuam thawn chungchangah hian an inrawlh niin an sawi bawk

<><><>

TRIPURA ARREST

Border Security Force (BSF) leh Govt. Railway Police (GRP)-ten dan lova Tripura-a lut, Bangladesh mi 7 leh Rohingya 2 an man. BSF thupuangtu sawi danin, Khowai Dist-a Rangichera Border Outpost atanga ramchhunga rawn luh ruk tum, Bangladesh mi hmeichhe pakhat leh hmeichhe naupang bakah midang 1 an man a, thu an zawhfiahnaah an thiante 2-in ramri kan tawhin Bagicherra khaw lam panin an kal mek tih an sawi a, state police-te nen Bagicherra khuaah dapchhuah hna thawk nghalin Bangladesh mi pahnih dang leh ram thenawm ami sumdawng tenau pakhat an man leh a ni.

Zirtawp zan khan GRP mi-ten Agartala rel station-ah Rohingya hmeichhe 1 leh midang 1 an man bawk. Myanmar atanga raltlan Rohingya maktaduai 1 chuangte chu kum 2017 atang khan Bangladesh-a Cox Bazar relief camp hrang hrang-ah an khawsa a, camp-a khawsa mi engemawzatin dan lovin India ramchhungah an rawn lut tawh a ni.

<><><>